

O baro phral phirgya, phirgya thay resto ekh shivalnya. Achhilo zhi ko ekh zhami thay zadikhlya pes. Andral dikhlya les o chorbadzhis thay vakergya leske te den les thay dinya les buti.

O tsikno phral phirgya, phirgya thay nashaldilo ko poles. Ratilo thay nanas kate te zachhol. Uklistilo ekhe kashteste te presovel. Prezhal i rat telal o kashtes ale chora te genen pe frolya. Ola dikhle les thay vakerde leske ushlyol tar o kasht. Phuchle les soske si upre, a ov vakergya lenge pe dadeske, kay tsidingya te siklyol tar o zhivotos. Ola daravde les, kay ako na tsidela lentsar te chorel, ka mudaren les. O chhavo e sherutneske nanas so te kerel thay tsidingya lentsa. Achhilo chor.

Nakhle kalka duy bresha thay o duy phrala reste pes. O baro chhavo achhilo shivachis thay ingela pesa tsikne butya te loshanderel pe manushen thay hari frolya. O tsikno phral ingela pesa ekh gono frolya.

Reste pash pe dadeste thay ov but lilyas te loshanel lenge. Zaphuchlyas len so siklile tar o zhivotos. O baro chhavo vakergya kay achhilo shivachi, a o tsikno dinya o gono frolyantsa. Leskoro dat phuchlya les katar zomka but frolya isi les, a ov vakergya leske kay achhilo chor.

O dat but nerverisalilo thay ipalgyas les pe kherestar. O tsikno chhavo nanas so te kerel thay tsidingya gav zhi gaves ta te achhyol lachho thay bukyarno manush. Phirgya, phirgya thay resto pes lachhe manushentsa, kola ule kovachya. Ov vakegya lenge po zhivotos thay pomolingya len te sikaven les lachheske, ta te ashti te loshangerel pe dades.

Kergya but bresha buti thay achhilo kovachi. Kay shungya leskoro dat, gelo pash leste. Manglyas lestar te zhan peske khere. Leskoro chhavo saglasisalilo, gele peske ko kher thay zabeteshte lachhipnasa.

